

# 1 Pita

---

## Wimaamala

**1** <sup>1</sup>Tau Pita, Yesu Keliso a tu wituwetuwega.

U nugotuhu geka a gilumiyahi uyahimi, taumi Yaubada a lawa i winaganimi po o ihewahewa tupo wohepali uyahihhi. Naka tupohihi uyahihhi o memae, Ponito, Galatiya, Kapadosiya Asiya ma Bitiniya.

<sup>2</sup>Houga a wawala uyahina Yaubada Amata amaka i nugotuhu nonogogeta po uyahinei i winaganita, yaka Alugo Woiyawa i liyeuyeuta ma Yesu Keliso talanei i oga haleta po ipa ta wiponawogogeya.

Yaubada a lunugotootogo ma a nugodumola uyahimi ina lata.

## Witumagana Yesu Keliso binei

<sup>3</sup>Yaubada ta wotalagiyea, tauna ata Guyau Yesu Keliso Amana, tauna a lunugotootogo i lata duma uyahita yaka luyagohana wouna i weleta, po ta guni meta. Ma gwauta i yala houga e nenei binei babana Yesu Keliso hilage uyahinei amaka i towolo meme, <sup>4</sup>po ata meyagai hoi yada e noonogogeya, uyahina apegaa buda po apapoe ta wialoni. <sup>5</sup>Houga geka uyahina e iloguloguta ata witumagana uyahinei po houga sigasigana uyahina apo luyagohana ta tuhagaya. <sup>6</sup>Yaka ta kaoha labatana u nuginugota, ma tamogi houga kuku hotana uyahita apo nuguodubu po wiyuwa ta wialonihi. <sup>7</sup>Ludadanahi Yaubada uyahinei ipa ata witumagana a kadidili ina lugeletuya. Tauta galenata mei gole, naka lawa he apuya po ginouli yeueu dumana. Naka pitenana ata witumagana gole i gelagoni babana ginouli memewahagana, ma tamogi ludadanahi Yaubada uyahinei po ipa ina liyeuyeuta, po Yesu Keliso a houga gunawilana iyetana uyahina ta huneya po ta wotalagiyea po ina gelagona duma. <sup>8</sup>Yesu Keliso galenana ega ota galeya ma tamogi omi luhogala uyahina e memae, mei geka hougana ega tata galeya ma ata witumagana po ata kaoha tauna binei ega emoemotata po ta hiyawa pahi. <sup>9</sup>Witumagana uyahinei luyagohana dewadewana u nuginugota ta ialoni.

<sup>10-11</sup>Luyagohana geka tu bahapiko odubohi hi bahabaha pikogeya, naka Keliso Alugona u nuginugohi i ibaabani i pa, ‘Keliso wiyuwa apo ina

wialoni po u mulina a wasawasa ina tuhagaya'. Hai baha pikona anona hi nugoziyahiyawehi po hi beiha kadidili hi pa, lawa awai po houga awai apo lawana hina hanapugeya.<sup>12</sup> Yaubada i wogeleteya uyahihhi ipa hai baha pikona ega tauhi ubeihi, ma hapa geka ubeita. Ma Alugo Woiyawa yadei i himila hopuniyai po tauna uyahinei tuwega dewadewana lolowa hi ibaabaniyeya amaka o nonoli. Tu winoyanoya mi yadena ipa geka ginoulihi anohi hina galena tuhagahi.

### Mae waiwoiyawana

<sup>13</sup> Uyahinei, ona nugokadidili dewa dewadewana binei, ma upumi hina hegoya. Ma ona inugonugotuhu lagona Yesu Keliso a lunugotootogo hougana ina wogeleteya uyahina apo ina welemi. <sup>14</sup> Yaubada uyahina ona wiponawogo ma ega omi luhogala apapoehi hina tanitaniwagemi, po mei lolowa omi winugoneina hougahi uyahihhi. <sup>15</sup> Mae waiwoiyawana ona wotagoya babana Yaubada tauna a mae i wiwoiyawa. <sup>16</sup> Mei Yaubada a Buka uyahina hi bahebaheya hi pa, wiwoiyawa maena ona mimiyeya babana tau woiyawa.

<sup>17</sup> Yohola apo Yaubada a luhetala dumadumaluna ina geleta uyahita, po ina libahibahita ata bagibagi dewadewahi po apapoehi uyahihiyei. Yaubadana uyahina o laupali o pa, 'Amiyai', yaka anai wiyatayatem i ona matouteya omi luyagohana hougahi uyahihhi babana tauta ta ihewahewa.

<sup>18</sup> Odubona googata hai dewa mei gamogamo po ta wootagohi ma tamogi Yaubada i imiheta. Ega mei gapola yababayaba kina bo toea uyahinei, <sup>19</sup> ma gapola gegena naka Yesu Keliso talana, tauna mei sipi natuna dewadewana po yeuyeuna googata hi italaguyabehi hai apapoe paligililahi ubeihi. <sup>20</sup> Yaubada Keliso i winagana tahaeya u mulina apoma hipuli atapuna i wiwawali yaka geka houga waimulina Kelisona i wogeleteya tauta ubeita. <sup>21</sup> Yaubada Keliso hilagei i witowolo meya po a wasawasa i wogeleteya. Uyahinei Yaubada ta witumaganeya. Yaka Keliso uyahinei Yaubada ta nuginugotuhu lagoneya anai witumaganata.

### Guni meme

<sup>22</sup> Tahaya dumadumaluna amaka ta wotago imahiyeyaa po uyahinei nuginugota hina yeuyeu po wiwalehina dumadumaluna Yaubada i weleta, yaka ona lauhogala lawa emosi po emosi uyahihhi nuginugomi atapuhiyiei. <sup>23</sup> Tauta guni memeta ega amamata uyahihiyiei ita nei, ma guni memeta naka Amata a baha lauyagohanana po memewahagana uyahinei i nei yaka apo ata luyagohana ina mewahaga. <sup>24</sup> Mei Yaubada a Buka i bahebaheya i pa,

'Lawa ataputa galenata mei hiyamoni,  
yaka ata didiga mei hiyamoni belahi.

Matababana hiyamoni houga kuku hotana ma apo ina hilage,

ma a bela apo ina kokodila po ina peu.

<sup>25</sup> Ma Yaubada a baha apegia ina buda.'

Tauna bahana houga magomagouna ta noonoli tuwega dewadewana uyahinei.

**2** <sup>1</sup>Amaka tauta ta guni meta yaka ipa ata apapoe magomagouhi ata dewa koyakoyama, ata wiwalewalegama, ata omgenagenalili, ata wialutu magomagouhi ta wihinigigiye. <sup>2</sup>Guni memeta ipa mei logaloga meyameyata uyahinei ata luhogala baneina Yaubada a baha dumadumaluna binei mei logaloga gugu he lauhogaleya pite. Naka uyahinei apo luyagohana ta tuhagaya. <sup>3</sup>Babana Guyau a nugodewadewa amaka ta tuhagaya.

### Yaubada a numa e wogowogoya

<sup>4</sup>Yaubada a numa lawa uyahitiye i wogowogoya ma a ogola banei dumana naka Yesu Keliso, tamogi ogolana lawa hi wihinigigiye. Uyahinei tauta ta nae uyahina <sup>5</sup>po ta wimodale a numa binei. Ma numana u hinena tauta tu witalaguyaba waiwoiyawata po ata ombenena yeuyeuna ta weleweleya Yesu Keliso gowanei, naka Yaubada ta laikaohaya. <sup>6</sup>Mei a Buka uyahina i bahebaheya pite i pa,

‘Ona galeya ogola dewadewana a winagini

po a houna tahaeya numa wogona binei Saiyonu dobuna uyahina.

Apo iyai ina witumaganeya yaka apegia ina wihinimaya.’

<sup>7</sup>Yaka tauta iyawoi Yesu Keliso ta itumaganeya naka ogolana i dewadewa duma, ma iyawoi tauhi ega hita itumaganeya naka ogolana ega hita luhogaleya. Ma Buka i baheya i pa,

‘Tu lunuma ogolana hi ihinigigiyea

Yaubada amaka i buiya po ogola magomagouhi i haki lagonihi.’

<sup>8</sup>Ma gasi i bahena meya i pa,

‘Yohola apo ogola geka uyahina lawa aehi hina labatehi po hina peu.’ Hina labatena mehi po hina pipeu, matababana Yaubada a baha ega hita wiponawogogeya naka Yaubada a nugotuhi.

### Tauta Yaubada a lawa

<sup>9</sup>Tamogi tauta Yaubada a guguni wainaganata po tauta Wasawasa a tu witalaguyaba ma a bolu baneina waiwoiyawata. Tauna tupo uguwa uyahinei i otugeta po yayata uyahina i hounita ipa omhunana ta wohepaya. <sup>10</sup>Lolowa tauta ega guguni emosi ma geka hougana amaka tauta Yaubada a guguni. Lolowa Yaubada a lunugoototogo ega tata wialoni, ma geka hougana amaka ta tuhagaya.

### Ata lugagayo tu meuputa u matahi

<sup>11</sup>U lawa, tauta hoi hipuli ta ihewahewa uyahinei a laihunami, ipa omi luhogala apapoehi u nugonugomi he memae ona wihinigigiye, babana omi

luyagohana Yaubada uyahinei he igawiyehi.<sup>12</sup> Ma omi mae ona woimahi tu meuputa u matahi, ma inapa hina iapapoenimi naka ega genona babana Yaubada a houga gunawilana uyahina omi bagibagi dewadewahi hina wogeletemi po tu meuputa lawahi Yaubada hina huneya.

<sup>13</sup> Tauta amaka ta palihalena meta Guyau uyahina yaka gabemani hai taniwaga uyahina ta wiponawogo, po gabemani taniwaga baneina hipuli geka uyahina. <sup>14</sup> Gabemani ta wiyyateyatehi babana Taniwaga Baneina tauna hai bagibagi i welehi po tu apapoe hina taniwaga kadidili uyahihii, ma tu dewadumalu hina kawaidewedewehi. <sup>15</sup> Yaubada a nugotuhu geka pitenana i pa, apo lugagayo atapuhi ta wiponawogogehi po uyahinei ma tu winugoneina hai ompalidibodiboga ina yababa. <sup>16</sup> Tauta amaka Yaubada i palihaleta, ma tamogi ega ipa dewa apapoehi uyahihii ta neneae ma ipa Yaubada a tu bagibagi dewadewata. <sup>17</sup> Lawa atapuhi tana iyateyatehi. Tu witumagana lawahi ta lauhogalehi. Yaubada ta matumatuteya. Gabemani taniwagana tana iyateyateya.

### Tu bagibagi a ututu

<sup>18</sup> Taumi tu bagibagi hota omi babada anai wiyyateyatemi ona iponawogogehi ega ipa lawa a dewa wodewadewana tunawana ma lawa a dewa woapapoena gasi. <sup>19</sup> Apo ega omi apapoe ma Yaubada a nugotuhu binei hina lainugodubu ybabami yaka naka i haki wahaga, ma on'omtaibagibagi Yaubada u matana. <sup>20</sup> Apo omi dewa apapoehi ubeihi ma hina kodikodilimi ma on'omtaibagibagi naka ega ita haki. Ma inapa omi mae dewadewahi ubeihi ma hina kodikodilimi ma on'omtaibagibagi naka Yaubada u matana i haki duma.

### Keliso ubeita i wiyyuwa

<sup>21</sup> Yaubada amaka i otugeta wiyyuwa tahayana uyahina babana Keliso ubeita i wiyyuwa po ani galena i houni uyahita yaka ipa tauta ta witutupoganeya.

<sup>22</sup> 'Ega kikina a apapoe gehouna  
po ega ita ikoyakoyama.'

<sup>23</sup> Hi widibogi ma ega hai baha ita wimiheya, wiyyuwa hi weleya ma ega ita luuyogigai ma tamogi i witumagana kadidili Yaubada uyahina babana tauna taniwaga dumadumaluna. <sup>24</sup> Keliso hinina i wiyyuwa tauta ubeita po hi witakeya po a wiyyuwanu uyahinei ata apapoe witeina i awalihi, yaka ipa mae dumadumaluna binei ta neneae po ta hilage babana ata dewa odubohi uyahihiiyei amaka ta hilage. <sup>25</sup> Ma lolowa tauta mei gamogamo weluwelupowata ma amaka ta gunawilena meta Tu galena iteteta uyahina babana alugota hai taniwaga tauna.

### Tutu tawine ata numahine lugagayohi

**3** <sup>1-2</sup> Wiwine tawitawinem i agagomi ona wiyyateyatehi. Ma tauhi Yaubada a baha ega hita itumaganeya ona wiyyateyatehi. Ega ona

wobahabaha ma omi mae hina yeuyeu po uyahinei hina galena tuhaga ma hina witumagana.<sup>3</sup> Ega ipa hinimi yawa ona ihiyeya po apalami ona beipi imahiyeya, ma ega wihiya belana dewadewana uyahinei ona ihiyena memi ma ega kaleko dewadewana ona luiluiya.<sup>4</sup> Tamogi ipa wihiya memewahagana uyahinei nugonugomi ona wihiyehi naka nugohegoya ma nugoyato uyahihiyei, tauhi mae dewadewa dumahi Yaubada u matana,<sup>5</sup> po mei odubona wiwine waiwoiyawahi hai winugonugotuhu lagona Yaubada uyahina ma dewahi hi mimiyeхи po agagohi hi iyateyatehi.<sup>6</sup> Mei Sela agona Abelaham uyahina i wiponawogo ma i kawaibadeya. Ma inapa taumi omi dewa mei Sela po ega awai gehouna ona matutetaya yaka googana taumi.

<sup>7</sup>Taumi tutu tawine ololotomi, wiwine o lawagihи po mitehi o memae, ipa ona winugonugotuhu imahi po ona wiyatayatehi meka po apo Yaubada omi lupali anona apegia ina welemi. Babana tauhi ega hita kadidili duma, tamogi tauhi po taumi omi luyagohana emosi houga e nenei uyahina.

### Wiyuwa ta ialoni

<sup>8</sup>Geka u baha anani kokoe uyahimi ma emosi po emosi ona winugoe mota. Omi lawa hai pilipili ona genogehi. Walewalehimi ona lauhogalehi. Lunugootogo po nugohopuhopu dewahi uyahihiyei ona mae.<sup>9</sup> Apo uyahimi dewa apapoena hina dewaya yaka ega ona laubigo, apo hina paliapapo enimi yaka hai baha ega uyogigaigei ona imiheya, ma nugohegoyagei hai baha ona wimiheya. Babana tauta Yaubada amaka i winaganita ipa tauta nugohegoyagei tana ibaabani, yaka apo Yaubada ina kawaide wedeweta.<sup>10</sup> Geka pitenana Yaubada a baha i baheya i pa,

‘Apo iyai luyagohana ina luhogaleya  
    po houga dewadewana ina wialoni  
        yaka houga magomagouna a baha wihapona  
            po a wikoyakoyama ina wohounihi.

<sup>11</sup> Gasi a dewa apapoehi ina wihinigigiyeхи  
    ma lawa uyahihii a dewa hina dewadewa,  
        po a luhogala baneina winugoe mota.

<sup>12</sup> Matababana ata Guyau houga magomagouna tu dewadumalu i  
    luhogalehi  
        po hai lupali i nonola imahiyeya  
            ma tu apapoe i mepuputehi.’

<sup>13</sup> Apo mae dewadewana ta luhogaleya, yaka apegia iyai gehouna ina wigawiyeta. <sup>14</sup>Apo dewa dewadewa ta mimiyeхи ma lawa hina ihiniwiwata ega ta genogeno po gasi ega ta matomatouta, babana Yaubada apo ina kawaide wedeweta.<sup>15</sup> Yaka nugonugomiyei Keliso uyahina ona pa, ‘I Guyau waiwoiyawana’. Apo lawa awai ina lubayademi

ina pa, ‘Matababana awai ma Keliso o itumaganeya?’ Yaka a nonogomi lawana a lubayadana ona imihaya,<sup>16</sup> anai wiyatayatemi po anai nugohegoyami. Tauta Keliso tu wotagona uyahinei dewa dewadewahi ta wootagohi. Ma inapa hina palipaliguyoguougeta, yaka apo hai baha hina wihinimaehi ata dewa dewadewahi ubeihi.<sup>17</sup> Dewa apapoena binei wiyuwa ta ialoni naka ega ita dewadewa. Ma dewa dumadumaluna binei ma wiyuwa ta tutuhagaya naka Yaubada a nugotuhu.<sup>18</sup> Naka pitenana Keliso lawa dumadumaluna ma tauta tu apapoe ubeita mala emosi i hilage ipa ina weluwinita Yaubada uyahina. Hinina hi lihilageni ma alugona uyahinei i luyagohana meme.<sup>19</sup> Naka hougana i hopu hiyoyowa tu miyena uyahih i guguya.<sup>20</sup> Ma lawahi uyahih i guuguya naka, tauhi odubona Nowa hougana wam i ginoginouli uyahina Yaubada hai wiponahahalena binei i'mtaibagibagi. Ma tamogi goila hopu uyahina hi halele pahihi ma magouhi 8 tunawahi hi luyagohana wam uyahina.<sup>21</sup> Goila geka bapatiso wekiwekilalana, apo uyahinei ta togo yaka ta luyagohana. Bapatiso goilana ega hini yeuyeuna binei ma nugoyeuyeu Yaubada u matana binei, Yesu Keliso a towolo meme uyahinei.<sup>22</sup> Tauna amaka i gae hoi yada po geka hougana Yaubada u awala hinebawana e memae ma tu winoyanoya po tu taniwaga po tu manini e tanitaniwagehi.

### Ata dewa ta buinihi

**4** <sup>1</sup>Keliso tauna i wilawa hota po hiniwiyuwa i tuhagaya yaka taumi wiyuwa u hinena ona towolo kadidili po mei Yesu. Babana wiyuwa ta ialoni ata apapoe amaka ta wihinigigiyeji. <sup>2</sup>Uyahinei tauta hoi hipuli ta memae ata houga atapuna ta palihaleya Yaubada uyahina po ina taniwaga ma ega ata luhogala apapoehi hina tanitaniwageta. <sup>3</sup>Odubona uguwa dewahi ta dewedewehi yaka galenata mei tu meuputa, ma geka hougana ta wihinigigiyeji. Naka dewa buubuuwa, luhogala apapoehi, uma buubuuwa, matamaga, palouma po balau witumaganahi. <sup>4</sup>Ata lawa hoi uputa ata nugobui ega hita galena tuhagaya yaka hi kawaiapapoena, babana dewa buubuuwa ega tata wootagoya. <sup>5</sup>Tamogi Yaubada a luhetala iyetana uyahina apo ina luhetalehi, lawa lauyagohanahi po hilahilagehi atapuhi. <sup>6</sup>Geka binei ma Yesu i hopu tu hilahilage uyahih i tuwega dewadewana i guguyeya babana hinihi libahibahi amaka i wialoni ma alugohi ipa apo luyagohana hina tuhagaya Yaubada uyahina.

### Tu witumagana ta luhogalehi

<sup>7</sup>Ginouli atapuhi hai houga kokoe amaka e gelegeleta, yaka nugenugomi hina lugiiiglihi ma upumi hina hegoya ipa ona laupali. <sup>8</sup>Ma ginouli baneina ipa emosi po emosi ona lauhogalena memi, babana luhogala emoemotana apapoe magomagouna ina nugotataya. <sup>9</sup>Ma omi numa guduhi ona hoenihi po lawa ona haguhaguhi ma ega ona

lauhinidoodola.<sup>10</sup> Yaubada guta tapuna po tapuna amaka i weleta, ma gutahi ta wibagibagihi po uyahihiyei lawa ta haguhi yaka tauta Yaubada launugotootogona a tu bagibagi dewadewata.<sup>11</sup> Tauyai tu luguguya Yaubada a baha dumana to lauguguyeya. Ma taumi tu wihaguhagu omi kacidili Yaubada i weleweleemi uyahinei ona ihaguhagu. Yaka apo ata bagibagi atapuhi lawa hina hanapugeya po Yaubada hina wotalagiyeya Yesu Keliso gowanei. Matababana tauna Wasawasa po Kadicili memewahagana. Moina.

### **Yesu a bolu wiyuwa tu wialonina**

<sup>12</sup> U lawa, ega nugonugomi hina gohogoholihi wiyuwa baneina o ialonihi ubeihi. Naka wiyuwahi ega ginouli wouhi. <sup>13</sup> Ma Keliso wiyuwa geka pitenana i tuhagaya, inapa tauna binei ma wiyuwa ona wialoni yaka ona kaoha duma, babana ona wiwasawasa gogona. <sup>14</sup> Inapa lawa hina paliguyoguyougemi, babana taumi Keliso tu wotagona yaka ona kaoha duma, ma ipa ona hanapugeya Yaubada Alugona Waiwasawasana e memae uyahimi. <sup>15</sup> Taumi ega ita linanami ipa dewa apapoehi ubeihi hiniwiyuwa ona wialonihi yaka omunugo, danene, geno yababa, po dewa apapoehi gehouhi ona wihinigigiyehi. <sup>16</sup> Ma dewa emosi hota i lainanami naka taumi Keliso a bolu yaka gowana binei ma apo hiniwiyuwa ona ialonihi, ega ona ihinimaya tamogi Yaubada ona wotalagiyeya. <sup>17</sup> Houga amaka i geleta po Yaubada a luhetala ina wiwawali a guguni uyahita. Ma u mulina Yaubada a tuwega dewadewana tu wiponahahalenahi apo libahibahi banei dumana hina wialoni Yaubada uyahinei. <sup>18</sup> Mei Yaubada a Buka i bahebaheya i pa,

‘Tu dewadewa kikina ma apo libahibahi hina wialoni

tamogi tu apapoe witai banei dumana apo hina wialoni.’

<sup>19</sup> Tauta iyawoi Yaubada a nugotuhu binei ma wiyuwa ta ialoni, ta palihalena meta uyahina po ina galena iteteta, babana tauna tu wiwawalita po a paliwitumagana hi dumalu, yaka a dewa dewadewahi ega ta wohounihi.

### **Tanitaniwaga hai ututu**

**5** <sup>1</sup> Taumi tanitaniwaga geka a palipaliweleemi omi bagibagi binei, babana tau taniwaga gehouna. Keliso wiyuwa i ialoni tau tu limoinena gehouna, po apo a wasawasa ina wogeleteya u guta apo ina weleu. <sup>2</sup> Babada, omi bolu ona galena itete imahiyehi babana tauhi Yaubada a lawa i weleemi ipa ona taniwagena imahiyehi. Ona gagalena itete Yaubada a luhogala binei ma ega omi wigapola binei, ipa ona wileta po lawa ona haguhi. <sup>3</sup> Ega ipa ona ibadabada lawa uyahihie ma ani galena dewadewana ona wiatatiyehi omi mae uyahihiyei. <sup>4</sup> Ma houga u matata Tu galena itete baneina apo ina nei po unuhau wasawasana ona waya po ina mewahaga.

<sup>5</sup>Taumi ololoto woumi tanitaniwaga ona wiyateyatehi po atapumi ona nugohopuhopu gogona, ma emosi po emosi ona iyateyatena memi. Mei Yaubada a Buka i bahebahaya i pa,

‘Tu nugogegae Yaubada i wigawiyehi,  
ma tu nugohopuhopu i lunugotootogogehi.’

<sup>6</sup>Uyahinei ona nugohopuhopu ma ona palihalena memi Yaubada Manimaninina u nimana po houga dumanei apo ina houna geletemi.

<sup>7</sup>Omi nugogeno atapuhi Yaubada ona weleya babana apo ina galena itetemi.

### Ata wiyuwa ma ata hagu

<sup>8</sup>Upumi hina hegoya ma omi gawiya Tomodulele ona gagalena imahiyeya, babana tauna mei layioni e wiiwila nae ma a yam lawa e bibeihia. <sup>9</sup>Tauna ona lutomgeya po ona towolo kadidili omi witumagana uyahinei, babana ta hanapugeya tu witumagana tupo wohepali uyahina wiyuwa baneina he tutuhagahi Tomodulele uyahinei.

<sup>10</sup>Omi wiyuwa houga kukuna ona wialoni ma u mulina Yaubada apo ina woimahiyemi po ina wikadidilimi po ona towolo momota. Babana Yaubada Tu lunugotootogo, yaka i otugeta po ipa a wasawasa memewahagana uyahina ta mae Keliso mitehi. <sup>11</sup>Tauna Wasawasa po Kadidili memewahagana. Moina.

### Baha wimaamala

<sup>12</sup>Omi leta habuluna walehita dumadumaluna Sailasi i haguwe po a gilumiyahi uyahimi, Yaubada lunugotootogo moinanei a paliwelemi po a wikadidilimi.

<sup>13</sup>Ma tu tapalolo Babiloni u tuponana tu mae tauhi mei taumi Yaubada i inaganimi, hai wimaamala taumi uyahimi. Ma natuwe Maki a wimaamala uyahimi. <sup>14</sup>Emosi po emosi ona lauhogalena memi po omi luhogalana winiuyagonagei ina lugeletuya.

Yaubada a nugodumola taumi Keliso tu wotagona ina melabenimi.